

Inatsisartut suleriaasianni § 37, imm. 1 naapertorlugu, matumuuna apeqqutit uku Naalakkersuisunut saqqummiuppakka:

- 1. UKA2013/124-imi aalajangiiffigisassatut siunnersuummut allannguutissatut siunnersuutip akuersissutigineqarneranut atatillugu Naalakkersuisut peqquneqarnerannik naliliineq sumut killippa, naliliinerlu inaarutaasoq qaqugu Inatsisartunut saqqummiunneqarnissaa ilimagineqarpa?**
- 2. Sinerissap qanittuani aalisarnermut killigititap basislinjamit 12 sømilinik killeqarfimmu annertusisinneqarnissaata pitsaaqutai, pitsaanngequtaalu nassuiaatigineqassasut Naalakkersuisut piumaffigineqarput, tassungalu ilanngullugu aalisariutit 30 meterinit annerusut basislinjap 12 sømilimillu killeqarfiup iluani aalisarsinnaajunnaarneqarnissaat.**
- 3. Sinerissap qanittuani aalisarnerup basislinjamit 12 sømilinik killeqarfiup tungaanut ungavartinneqarnera aalisarnermik ingerlatsisunut pisortanit pigineqartunut namminersortunillu pigineqartunut sukkut aningaasatigut pitsaaquteqarlunilu pitsaanngequteqassava, tassunga ilanngullugu aa?**
- 4. Aalisariutit 30 meterinit anginerusut ungasinnerusumut isigisumik nungusaataannngitsumik aallaaveqartumik atuinnermut navialisitsinerat Naalakkersuisut isumaqatigaat?**
- 5. Aalisariutit 30 meterinit annerusut basislinjap kiisalu basislinjap avataani 3 sømilinit avasinnerusumi aalisartut qanoq amerlatigippat?**
- 6. Apeqqut 2-mi allanneqartutut allanngineq aalisartitseqatigiinnit attorneqartunit eqqartuussivikkut suliassangortineqarnissamut/piumasaqaateqarfigineqarnissamut aarlerinannngitsumik ingerlanneqarsinnaava?**

(Lars Mathæussen, Siumut)

Tunnngavilersuut:

Aalisakkat qaleruallit ukiuni arlalinni ikiliartortut paasivara, tamannalu aalisartunik oqaloqateqartarnimma uppersarpaa. Inuiaqatigiittut nungusaataannngitsumik toqqammaveqartumik aalisarnitta qulakkeernissaa pingaartuusoq isumaqarpunga.

Sinerissap qanittuani aalisakkanik qalerualinnik aalisarnermi angallatit annerusut peqassutsimut navialisitsinerpaapput. Tamaammallu ukiaanerani ataatsimiinnermi, sinerissap qanittuani aalisarnerup basislijamit 12 sømilimik killeqarfimmut ungavartinneqarnissaa siunnersuutigilersarpara, tassungalu ilanngullugit angallatit 30 meterinit annerusut basislinjap 12 sømilimillu killeqarfiup iluani aalisarsinnaajunnaarnissat ilanngullugu. Tassungalu tunngatillugu apeqqutit siuliani saqqummiussama akineqarnissaat kissaatigaara.

Apeqqutima ullut suliffiusut qulit ingerlaneranni akineqareersimanissaat kissaatigaara. Killigitap taassuma eqqortinneqarnissaa uannut pingaaruteqarpoq, akissutimmi 2014-imi inatsisartut ukiaanerani ataatsimiinnissaanni § 33 naapertorlugu siunnersuummut tunngavisseeratarsinnaapput.